



COMUN DI UDIN
Servizi Culture e Istruzion

INFORMATIVE PAI CENTRIS RICREATÎFS ESTÎFS DAL AN 2025



A) MODALITÂT DI ISCRIZION

Il Centri Ricreatîf Estîf al è un servizi educatîf e ricreatîf di interès public che al permet ai fruts, aes frutis, ai fantats e aes fantatis di trasformâ il timp libar dai mès estîfs in esperiencis impuartantis e divertentis di vite in comun cun chei altris zovins. L'obietîf principâl dal servizi al è che i fruts e i fantats si divertissin e che a stedin ben fasint ativitâts creativis, di zûcs motoris tal viert, de pratiche sportive, leînt e participant a laboratoris espressîfs, intun ambient plasevul e ospitâl.

Il centri ricreatîf estîf al à ancje une funzion sociâl parcè che vie pal Istât, cuant che lis scuelis a son sieradis, al jude lis fameis a conciliâ il rapuart tra famee e lavôr.

1. Prenotazions

Lis prenotazions pai Centris Ricreatîfs Estîfs (CRE) si presentin

di lunis ai 3 di Fevrâr a vinars ai 28 di Fevrâr dal 2025

dome **online** cul sisteme E-Civis, jentrant tal sît <https://udine.ecivis.it/> e fasint clic sul boton **Accedi all'area personale**. Par jentrâ tal portâl E-Civis al covente vê il SPID (Sisteme Public di Identitât Digjitâl) o la CIE (Cjarte di Identitât Eletroniche).

Par vê plui informazions sul SPID e su cemût otignîlu, consultâ il sît www.spid.gov.it.

Par savê cemût che si ative la CIE, consultâ il sît <https://www.cartaidentita.interno.gov.it/attiva/>

Par rivâ te sezion dai modui online, si à di lâ daûr di chest percors: **Accedi → Moduli online → Compila → Centri Ricreativi Estivi**.

Al è impuartant visâsi che si varà di jemplâ une domande par ogni minôr che si vûl zontâ.

Par fâ la prenotazion in maniere plui facile e svelte, al è miôr vê za cun se chestis informazions:

- codiç fiscâl dal titulâr de responsabilitât gjenitoriâl
- codiç fiscâl dal minôr
- credenziâls SPID o CIE
- ISEE 2025
- direzion di pueste eletroniche che e corispuindarà al recapit dulà che a vignaran mandadis DUTIS lis comunicazions leadis al servizi
- riferiments telefonics
- dâts dai delegâts che a puedin lâ a cjoli il minôr (cognon, non, date di nassite, celulâr, e v.i.).

La domande di prenotazion al servizi **no vignarà acetade** se a risultin faturis leadis ae frecuence dai CRE tai agns prin che no sedin stadis paiadis di cui che al fâs la domande o dal gjenitôr/tutôr coobleât o di un altri sogjet intestatari de fature o des faturis pal servizi.

NOTE IMPUARTANTE

Il sisteme di E-Civis al à dentri i dâts dal sogjet, denominât **“Tutôr”**, che tal 2024 o intai agns prin al à mandât la domande pe iscrizion al servizi CRE.

Si sugjeris che cui che al presente la domande pal an 2025 al sedi il sogjet registrât come **“Tutôr”**.

Il sogjet registrât come **“Tutôr”** tal sisteme di E-Civis al è l'intestatari dal avîs di paiament e de fature relative.

Se **par resons justificadis e comprovadis si à di mudâ il “Tutôr”** PRIN DI INVIÂ LA DOMANDE DI PRENOTAZION **si à di contattâ daurman i uficis par e-mail o par telefon:**

- progettieducativi@comune.udine.it

- 0432/1272790 e 0432/12772714

Cun di plui, PRIN DI INVIÂ LA DOMANDE DI PRENOTAZION, il tutôr al pues jentrâ te plateforme E-Civis e modificâ ducj i siei dâts fûr che il non, il cognon e il codiç fiscâl e corezi e/o modificâ la direzion di pueste eletroniche e/o il numar di telefon e altri. La modificazion de direzion di pueste eletroniche e à di jessi comunicade daurman ancje al Ufici Progiets Educatîfs, mandant ae direzion: progettieducativi@comune.udine.it il modul di variazion che al vignarà publicât tal sisteme E-Civis e tal sît dal Comun di Udin te pagine dedicate ai CRE, par vie che il sisteme no si inzorne in automatic ma al à di jessi il personâl dal Servizi a fâlu.

Si racomande di inviâ la domande di modificazion dal “Tutôr” e de direzion di pueste eletroniche dentri dai 25 di Fevrâr dal 2025 par podê inzornâ il sisteme.

Dopo che si à trasmetude la domande di prenotazione, i dâts metûts dentri no si podaran plui modificâ.

1. Acès al servizi

Par favorî l'acès a un numar plui alt di fameis, si pues prenotâsi a **massime trê turnis** par ogni minôr.

2. Spedizion des domandis

Al è une vore impuartant jemplâ la domande cun atenzion, parcè che dopo che e je stade inviade e ven protocolade in automatic e **no** si podarà plui ni modificâle, ni cancelâle, ni tornâ a presentâle di bessôi.

Par cancelâ la domande mandade, il tutôr al à di scrivi a progettieducativi@comune.udine.it e domandâ che e vegni cancelade, comunicant in maniere obbligatorie il numar identificatîf de domande furnît dal sisteme E-Civis e zontant un document di identitât dal tutôr.

Lis domandis di cancelazion a àn di rivâ ae direzion di pueste eletroniche dite sore dentri dai 25 di Fevrâr dal 2025.

Dopo dai 28 di Fevrâr dal 2025, date che si sierin lis prenotazions, i dâts furnîts te domande no si podaran plui modificâ.

3. Criteris pe elaborazion des graduatoriis

Lis graduatoriis si elaborin daûr di criteris di prioritât fissâts dal Regolament pe frecuence dai CRE, che al ten cont des modificazions specificadis te Deliberazion dal Consei Comunâl n. 11 dai 28/03/2022:

- residence tal Comun di Udin dal minôr o di almancul un dai titulârs de responsabilitât gjenitoriâl
- minôr che al à l'aciertament de disabilitât daûr de L. 104/92 tal moment che si presente la domande (cul limit massim dal 10% dai puescj a disposizion par ogni turni di frecuence in ogni CRE)
- minôr cun ducj i doi i titulârs de responsabilitât gjenitoriâl, ancje se no son convivents, lavoradôrs, o, tal câs di nuclî monoparentâl, minôrs cun titulâr de responsabilitât gjenitoriâl lavoradôr
- minôr cun altris minôrs convivents iscrits a CRE inmaneâts dal Comun di Udin
- cundizions economicis des fameis misuradis midiant dal indicadôr de situazion economiche ecuivalente (ISEE): a àn prioritât lis fameis cul ISEE plui bas

Lis cundizions ditis sore a àn di existi tal moment che si fâs la prenotazione online e duncje a àn di jessi declaradis cuant che si jemple la domande di prenotazione.

Lis domandis dai no residents si acetin dome par finî i puescj che a son restâts disponibii, doprant i stes criteris dits sore.

4. Graduatoriis

No son previodudis graduatoriis provisorii. Lis graduatoriis definitivis a vignaran publicadis tor i prins di Avrîl e si podaran consultâ tal sît dal Comun di Udin (www.comune.udine.it). Lis graduatoriis si puedin consultâ par sede e par turni.

Par consultâ lis graduatoriis si à di vê il numar de domande di iscrizion furnît dal sisteme E-Civis.

5. Listis di spiete

Par ogni CRE e vignarà fate une liste di spiete par jemplâ puescj disponibii, se a 'nd è, tal câs di rinunziis o di mancjade ocupazion totâl o parziâl dai puescj riservâts.

6. Paiments

A chei che, su la fonde dai criteris presentâts sore, a jentraran te graduatorie, ur rivarà, dome ae direzion di pueste eletroniche comunicade tal at de iscrizion, un avîs di paiament PagoPA intestât al gjenitôr/tutôr (il document si pues discjamâlu ancje dal sisteme E-Civis).

SI RACOMANDE DI CONTROLÂ CHE LA MAIL E SEDI RIVADE ANCJE TE CARTELE DAL SPAM.

Par perfezionâ la iscrizion al centri ricreatîf estîf, il paiament **al à di jessi fat dentri de date segnade tal avîs PagoPA; dopo di chê date la prenotazione e vignarà anulade in automatic cence altris comunicazions** e duncje no si furnirà nissune prestazion al utent, cu la consequence de risoluzion di cualsisei rapuart contratuâl daûr dal art. 26 dal DPR 633/1972.

Chest an la fature e vignarà mandade in automatic a ducj i utents che a son jentrâts te graduatorie. Pai turnis no confermâts cul paiament dal avîs PagoPA si emetarà une note di credit.

Si ricuarde, infin, di conservâ la fature e la ricevude di paiament, furnide dal sisteme PagoPA, pal ricognossiment di eventuâi contribûts/agievolazions (par es. la “Dote Famiglia”).

Si domande di no fâ paiments dopo de date segnade tal avîs PagoPA.

La prenotazione e vignarà in ogni câs anulade e lis sumis paiadis a vignaran rimborsadis daûr dai timps dal pont D) co. 3 plui indenant in cheste informative.

B) FASSIS DI ETÂT, SEDIS e TURNIS, ORARIS DI FUNZIONAMENT

1. Fassis di etât, sedis

Lis sedis scolastichis no àn l’implant di condizionament.

In cualchi sede scolastiche (“Nievo”, “Pellico” e “Ellero”) si fasaran voris in program dal mêis di Jugn a chel di Avost dal 2025.

a. CRE 3-6 AGNS (Giocaestate)

Par **minôrs nassûts dopo dal 01/01/2019 e che a àn finît trê agns** cuant che a frecuentin. Si fasin in chestis sedis di scuele de infanzie:

- scuele “Pick” – Vie della Polveriera n. 9
- scuele “Benedetti” – Vie Val di Resia n. 11
- scuele “Via Baldasseria Media” - Vie Baldasseria Media n. 23
- scuele “Zambelli - Vie Bernardinis n. 105

b. CRE 6-11 AGNS (Giocaestate)

Par **minôrs nassûts dal 01/01/2014 ai 31/12/2019** e si fasin in chestis sedis di scuele primarie:

- scuele “Nievo” - Vie Gorizia n. 18

- scuele “Divisione Alpina Julia” - Place Polonia n. 1
- scuele “Zardini” - Vie Padova n. 9
- scuele “Pellico” - Vie San Pietro n. 70
- scuele “Girardini” - Vie Judrio n. 1/A

c CRE 11-14 AGNS (Summer Play Camp)

Par minôrs nassûts dal **01/01/2011 ai 31/12/2014** e si fasin in cheste sede di scuele secondarie di 1ⁿ grât:

- scuele “Ellero” - Vie Divisione Julia n. 1

2. Turnis

I CRE 3-6, 6-11 e 11-14 agns a saran ativâts cun turnis di dôs setemanis (10 dîs lavoratîfs, dal lunis al vinars):

a. I turnis dai CRE 3-6 e 6-11 agns a son:

- Pre turni: dai 16 di Jugn ai 27 di Jugn (CRE 6-11: pes scuelis “Nievo”, “Divisione Alpina Julia” e “Zardini”)
- 1ⁿ turni: dai 30 di Jugn ai 11 di Lui
- 2^t turni: dai 14 di Lui ai 25 di Lui
- 3^e turni: dai 28 di Lui ai 8 di Avost
- 4^t turni: dai 11 di Avost ai 25 di Avost (te zornade dai 15 di Avost il servizi nol sarà atîf)

b. I turnis dai CRE 11-14 agns a son:

- Pre turni: dai 16 di Jugn ai 27 di Jugn
- 1ⁿ turni: dai 30 di Jugn ai 11 di Lui
- 2^t turni: dai 14 di Lui ai 25 di Lui
- 3^e turni: dai 28 di Lui ai 8 di Avost

Il 3^e turni dal CRE 11-14 agns al sarà inviât dome se il numar di participants al è plui grant dal 50% dai puescj a disposizion.

3. Oraris di funzionament

Ducj i CRE a àn chescj oraris:

- jentrade des 7.45 aes 9.00
- prime jessude des 13.00 aes 13.15 (cun ancje il gustâ)
- seconde jessude des 15.30 aes 16.15.

c) ATIVITÂTS DAL CENTRI ESTÎF

1. Programazion

In maniere indicative, la programazion de zornade e je cheste:

CRE 3-6 AGNS	CRE 6-11 AGNS	CRE 11-14 AGNS
7:45 – 9:00 Acet. Ativitâts di svicinament e introduzion ae storie contade. Ativitâts di	7:45 – 9:00 Acet. Ativitâts di ativazion e zûcs di moviment	7:45 – 9:00 Acet. Zûcs motoris didentri. Zûcs di taule

animazion cun zûcs e bai animâts		
9:00 - 9:30 Mirinde e azions cuotidianis di cure/igiene	9:00 - 10:30 Zûcs di grup	9:00 - 10:30 Laboratoris
9:30 - 11:00 Ativitâts teatrâls, creativis e sensoriâls	10:30 - 11:00 Mirinde e zûc libar	10:30 - 11:00 Mirinde
11:00 - 12:00 Ativitâts di moviment e/o di zûc	11:00 - 11:30 Ativitâts di moviment e sportivis	11:00 - 12:00 Ativitâts sportivis
12:00 - 13:15 Preparazion al gustâ e gustâ	11:30 - 12:30 Ativitâts a scuadris: cjace al tesaur, orientament, zûcs	12:00 - 13:15 Gustâ
13.15-14:00 Moment di zûc libar e polse	12.30-13.15 Gustâ	13:15 - 14:00 Zûc libar, polse, compits
14:00 - 15:15 Zûcs, leturis, laboratoris, ativitâts espressivis	13:15 - 15:00 Laboratoris creatîfs, ativitâts espressivis, zûcs musicâi	14:00 - 15:15 Zûcs di rûl, zûcs di taule, ativitâts ludichis
15:15 - 15:30 Mirinde	15:00 - 15:30 Mirinde e zûc libar	15:15 - 15:30 Mirinde
15:30 - 16:15 Seconde jessude	15:30 - 16:15 Seconde jessude	15:30 - 16:15 Seconde jessude

2. Ce che si à di puartâ tal Centri Ricreatîf Estîf

- Buracje personalizade
- Cjapielut
- Un sacut contrassegnât cun dentri lis scarpis di gjinastiche di doprâ te palestre pai CRE 6-11 e 11-14 agns
- Un sacut contrassegnât cun dentri un cambi complet di vistîts pai CRE 3-6 agns

Si consee di mandâ i fruts cun vistîts e scarpis comuts.

3. Gjitis/Escursions tal teritori

Il centri ricreatîf estîf al previôt escursions tal teritori e pai CRE 6-11 e 11-14 agns une gjite par ogni turni.

I minôrs a àn di jessi in stât di partecipâ in maniere autonome a dutis lis gjitis/escursions tal teritori cence meti in pericol la sigurece e la incolumitât lôr e di chei altris.

Intes zornadis des gjitis/escursions no si fasaran ativitâts alternativis, duncje il minôr che nol partecipe nol podarà frecuentâ il centri ricreatîf estîf in chês zornadis.

c) SUPUART AI MINÔRS IN CUNDIZIONS DI DISVANTAÇ

Cuant che il gjenitôr/tutôr al fâs la iscrizion online pal servizi di centri ricreatîf estîf, al à di indicâ il minôr cun disabilitât o in cundizion di disvantaç jemplant la schede informative obligatorie che e je te domande di prenotazion. Lis informazions inte schede informative a coventin par capî miôr lis dibisugnis dal frut o de frute e concuardâ, tal câs che al/e jentri te graduatorie, lis modalitâts plui adatis par frecuentâ il servizi.

Sieradis lis iscrizions, l'ufici si riserve di contatâ il gjenitôr/tutôr dai arlêfs che par chei il servizi nol à dâts e, se al covente, ancje di chei che al cognòs za, par vê plui informazions su lis dibisugnis comunicadis. Il pussibil contat al à dome un fin informatîf e nol rapresente in nissun câs une conferme dal fat che il minôr

al sedi stât acetât tal centri ricreatîf estîf. La informazion su la eventuâl acetazion tal centri ricreatîf estîf e vignarà fûr **dome** des graduatoriis che a son stadis fatis buinis.

Su la fonde des indicazions vudis, si fasarà une valutazion comune cu la dite apaltadore dal servizi di CRE, cul Servizi Culture e Istruzion e, se dal câs, cui Servizi Sociâi. Te valutazion si tignarà cont des dibisugnis dal minôr, de adeguatece dal servizi di CRE in relazion aes sôs dibisugnis e carateristichis, dal orari di permanence tal centri, de pussibilitât o no di partecipâ aes gjitis e aes escursions tal teritori. Si informe che tes zornadis des gjitis/escursions lis ativitâts alternativis a podaressin no jessi garantidis.

Si specifiche che NOL è previodût il rapuart 1:1 educadôr/minôr. Par ogni CRE e par ogni turni e je previodude la presince di un animadôr di riferiment socioeducatîf che al jude i animadôrs dal CRE stant daûr a ducj i minôrs in cundizions di disvantaç iscrits in chel turni e in chel centri.

Par partecipâ al servizi di centri ricreatîf estîf si à di vê une capacitât minime di interagjî tes ativitâts di grup, di zûc e di socializazion, di là di jessi autonomi tal ambit de igiene personâl, de alimentazion e dal control sfinteric. Cun di plui, si à di vê une minime capacitât di control des emozions, daûr de etât (gjesti la frustrazion, la rabie, e v.i.).

Par chest si invidin i gjenitôrs/tutôrs a stazâ lis capacitâts dal minôr di savê frontâ l'impegn dal CRE, indicant, in câs, un timp di frecuece curt.

Si specifiche che il servizi di centri ricreatîf estîf nol à une funzion socioassistenziâl e che no son presints operadôrs socioassistenziâls. Tal câs di minôrs che a domandin un rapuart educadôr/minôr di 1:1, la permanence tal centri estîf e vignarà decidude, cu la partecipazion de famee, tignint cont:

- de pussibilitât di assegnâ al minôr un operadôr/educadôr cun competencis specifichis pe assistance individuâl metût a disposizion dai Servizi Sociâi dai Comuns dal Ambit "Friûl Centrâl"
- de compatibilitât tra l'orari di cheste figure professionâl, lis necessitâts dal minôr e l'orari domandât de famee
- de pussibilitât de bande des fameis dai minôrs in particolârs situazions di disvantaç di vê un lôr operadôr fidât che i stedi daûr par garantî la permanence tal CRE su la fonde dai tims comunicâts tal moment de iscrizion.

D) TARIFIS, CUNDIZIONS PARTICOLÂRS E RIMBORS

1. Tarifis

Ai participants dal servizi di CRE si ur aplichin lis tarifis individuâls par ogni singul turni fissadis cu la deliberazion de Zonte comunâl n. 585 dai 19/11/2024.

			Tarife
A)	Par ogni turni cun 10 dîs efetîfs di frecuece par minôrs residents tal Comun di Udin (orari 7.45 – 13.15)	€	126,76
	Par ogni turni cun 10 dîs efetîfs di frecuece par minôrs residents tal Comun di Udin (orari 7.45 – 16.15)	€	195,00
B)	Par ogni turni cun 10 dîs efetîfs di frecuece par minôrs no residents tal Comun di Udin (orari 7.45 – 13.15)	€	144,30
	Par ogni turni cun 10 dîs efetîfs di frecuece par minôrs no residents tal Comun di Udin (orari 7.45 – 16.15)	€	222,00

2. Cundizions particolârs

Cundizions particolârs **dome pai residents**:

- esenzion totâl par stât di puaretât o altris câs di dificultât grave dopo che i Servizis Sociâi dal Comun a àn ricognossude cheste cundizion;
- tal câs che fradis e sûrs a sedin iscripts **tal stes turni**: la tarife dal prin utent si le paie par intîr, lis tarifis dal secont utent e di chei dopo (fradi e o sùr), si pain cuntune riduzion dal 20% dopo di vêlu comunicât te sezion di pueste de domande di iscrizion.
- riduzioni des tarifis daûr dal ISEE:

FASSIS I.S.E.E.	TARIFIS	Oraris	Oraris
	di paiâ par un valôr dal	7:45-13:15	7:45-16:15
- di € 0,00 a € 10.000,00	30% de tarife A) plene	38,03€	58,50€
- di € 10.000,01 a € 18.000,00	60% de tarife A) plene	76,05€	117,00€
- di € 18.000,01	100% de tarife A) plene	126,76€	195,00€

3. Atestazion ISEE

Par podê zovâsi des riduzioni des tarifis si à di **jessi residents tal Comun di Udin** e vê, dentri dal tiermin di presentazion des domandis, la **atestazion ISEE 2025**.

La eventuâl riduzion de tarife e vignarà calcolade di ufici su la fonde dal valôr par *Prestazions agevoladis indreçadis a minôrs o a fameis cun minôrs*, in cors di validitât, e registrade tal portâl dal INPS te date che si sierin lis prenotazions.

Pai utents che a àn declarât che A VUELIN ZOVÂSI des riduzioni des tarîfis leadis al ISEE e che a àn autorizât la Amministrazion Comunâl a doprâ i dâts ISEE registrâts te base di dâts dal INPS, la Amministrazion, cuant che si siere la fase des prenotazions, e proviodarà a recuperâ in autonomie chel dât dal portâl dal INPS. Il gjenitôr/tutôr **nol** varà duncje di comunicâ il valôr te domande.

Ai utents che a àn declarât che NO VUELIN ZOVÂSI des riduzioni des tarîfis leadis al ISEE e che no àn autorizât la Amministrazion Comunâl a doprâ i dâts ISEE registrâts te base di dâts dal INPS si ur aplicarà la tarife plene.

4. Rimbors

La rete di frecuece e ven rimborsade:

- al 100% dal impuart paiât dome se la rinunzie e rive al ufici competent dentri dai 31 di Mai dal 2025;
- al massim dal 60% dal impuart paiât dome tal câs di mancjade fruizion dal servizi, ven a stâi se l'utent nol à podût frequentâ il turni che al veve sielzût par motîfs grâfs, justificâts e documentâts; il turni si lu calcole no frequentât tal câs che l'utent al sedi assent in dutis lis zornadis dal periodi dal turni o in dutis fûr che une. La domande di rimbors e à di rivâ ai uficis competents dentri di 15 (cuindis) dîs di cuant che al finîs il turni.

Lis domandis di rimbors e di rinunzie a varan di rivâ in forme scrite al ufici competent dentri des datis e des scjadincis ditis sore.

Il modul par fâ la domande di rimbors al vignarà publicât tal sisteme E-Civis e tal sît dal Comun di Udin te pagjine dedicate ai CRE.

Ducj i rimbors a vignaran fats tacant dal mêis di Setembar dal 2025.

E) **SERVIZI DI RISTORAZION**

1. Refezion

I pascj a saran garantîts dal Servizi di Ristorazione Scolastiche: a vignaran servîts il gustâ e lis mirindis, a mieze matine e tal dopomisdî, daûr dal menù fat bon de Aziende Sanitarie.

Pes escursions programadis i minôrs a mangjaran al sac (il gustâ al vignarà furnît dal servizi di ristorazione comunâl).

Al è improibît inte maniere plui assolute puartâ cualsisei aliment o bevande dentri dal CRE.

Cul jemplâ la sezion intitulade **“Domande diete speciâl”** (“Richiesta dieta speciale”) de domande di prenotazione, il gjenitôr/tutôr al comuniche che il minôr al scuén osservâ, par motîfs di salût, une diete speciâl o evitâ determinâts gjenars di aliment par vie di alergiis o di intolerancis alimentârs o al pues domandâ di evitâ la somministrazion di cierts aliments par motîfs religiôs, etnics o culturâi.

Tal câs di une diete speciâl par motîfs di salût, il certificât medic pe diete speciâl, **se nol è za stât trasmetût vie pal an scolastic**, al à di rivâ dentri di 7 dîs di cuant che al è tacât il pre turni o il turni dal CRE, dome par email, ae direzion: ristorazione.scuole@comune.udine.it.

Par dutis lis **comunicazion e informazions leadis al servizi di ristorazion** i utents a varan di contatâ l'Ufici Ristorazione Scolastiche a un di chescj recapits:

E-mail: ristorazione.scuole@comune.udine.it

Telefon: 0432 -1272720

Altris informazions sul servizi di ristorazion a son a disposizion in cheste pagjine dal sît dal Comun di Udin: <https://www.comune.udine.it/Servizi/Ristorazione-Scolastica>

L'afidatari dal servizi di ristorazion dai CRE 3-6 agns al è la aziende CIRFOOD s.c. che e met a disposizion des fameis il sît “Menù Chiaro” (par vê plui informazions, visitâ

<https://www.menuchiario.it/comunediu dine/it/#/HomeMenu>) par informâlis sul menù dal dî e par conseâlis su la alimentazion sane e cussiente.

L'afidatari dal servizi di ristorazion CRE 6-11 e 11-14 agns al è la aziende CAMST che e met a disposizion des fameis il sît e la app (par vê plui informazions <https://menu.ristorazionescolastica.it/signin>) par informâlis sul menù dal dî e par conseâlis su la alimentazion sane e cussiente.

F) PARTECIPAZION AL SERVIZI DAL CENTRI RICREATÎF ESTÎF

1. Dovêes de utence

Cui che al partecipe al servizi dal Centri Ricreatîf Estîf al à di:

- vê vistîts pratics e adats aes ativitâts che si fasin tai Centris Ricreatîfs Estîfs;
- vê un compuartament coret, rispjetôs e no violent cu lis robis e cu lis personis.

Il Responsabil dal Servizi competent si riserve la facultât di doprâ proviodiments cuntri de utence (contestazion orâl o scrite, slontanament o suspension, daûr de gravitât dai câs) se e je aciertade la falsetât des declarazions fatis te domande di iscrizion, o se a sucedin fats o compuartaments che a puedin rapresentâ un disturb seri pal funzionament coret dal Centri Ricreatîf Estîf e/o provocâ un dam ae Aministrazion Comunâl.

La Aministrazion Comunâl e decline cualsei responsabilitât pe sotrazion di vistiaris o di ogjets a dam dai iscrîts.

G) CONTROI DES DECLARAZIONS

La Aministrazion Comunâl e à l'oblic di verificâ, ancje a campion, lis declarazions presentadis cuant che si à fate la domande daûr dal DPR 445/2000 e s.m.i. Se, su la fonde dai controis fats, al vignîs fûr che lis declarazions sometudis no fossin veris, ancje par minôrs in cundizion di disvantaç, la Aministrazion comunâl, aplicant la norme dite sore, e fasarà decjadê il benefici, ven a stâi e sospindarà i minôrs dal servizi di centri ricreatîf estîf in cors.

H) DOCUMENTS

- Tarifarî in vore
https://www.comune.udine.it/ocmultibinary/download/9448/117688/3/4073fd409fc4c78ed3fd60e80261a482.pdf/file/AllegatoC_Delibera_585.pdf
- Regolament pe frecuence dai Centris Ricreatîfs Estîfs
[https://www.comune.udine.it/content/download/13229/194979/file/Regolamento_CRE_\(1\).pdf](https://www.comune.udine.it/content/download/13229/194979/file/Regolamento_CRE_(1).pdf)
- Cjarte dai Servizis dai Centris Ricreatîfs Estîfs
<https://www.comune.udine.it/ocmultibinary/download/13229/194981/5/99e030cda22d01e3eebdd2f6f6f40c1f.pdf/file/cartaservizicre.pdf>

Ducj i documents si puedin discjamâ dal sît dal Comun di Udin.